

萬 有 文 庫

第 二 集 七 百 種

王 雲 五 主 編

讀 史 方 輿 紀 要

(九)

顧 祖 禹 輯 著

商 務 印 書 館 發 行

讀史方輿要紀

(九)

顧祖禹輯著

萬有文庫

第二集七種

總編者
王雲五

商務印書館發行

讀史方輿紀要

卷二十二

江南四

淮安府

東至海岸二百三十里。南至揚州府三百二十里。西至鳳陽府泗州百九十里。北至山東莒州五百九十里。西北至山東沂州五百四十里。自府治至江寧府五百里。至京師二千五百里。

禹貢揚州之域。春秋屬吳。戰國屬楚。秦屬九江郡。漢屬臨淮郡。後漢屬廣陵郡及下邳國。三國魏為臨

淮。廣陵二郡地。晉因之。東晉時建為重鎮。義熙中分廣陵立山陽郡。劉宋因之。泰始中又僑立兗州。淮治

陰縣。齊曰北兗州。亦為重鎮。梁因之。大清中沒於東魏。改置淮州。又分置淮陰郡。隋開皇初改置楚州。十

二年移治山陽。大業初州廢。改屬江都郡。唐武德四年置東楚州。八年改為楚州。天寶初曰淮陰郡。乾

元初復故。五代時升為順化軍。舊史後唐長興三年升楚州為順化軍。授吳越錢元珣為節度使。鎮明州。時楚州屬於楊吳。蓋遙領也。宋亦曰楚州。亦曰山陽郡。建炎四年置楚泗承州及漣

水軍鎮撫等使於此尋廢

宋末改淮安州。元爲淮安路。屬河南行省。明初改爲淮安府。直隸京師。領州二。縣九。今仍曰

淮安府

府阻淮憑海。控制山東。春秋時。夫差欲通中國。道出江淮。卽從事於此。及曹丕謀吳。舟師亦繇此而南也。其後南北有事。輒倚爲重鎮。東晉初。以祖約。劉隗。相繼守此。荀羨曰。

羨永和中鎮淮陰

淮陰舊鎮。地形都要。

水陸交通。易以觀釁。沃野有開殖之資。方舟有運漕之利。是也。太元三年。苻秦入寇襄陽。其兗州刺史彭超曰。願更遣重將攻淮南諸城。爲碁劫之勢。東西並運。丹陽不足平也。堅從之。益發兵寇淮陰。盱眙。蓋淮陰去丹陽四百里而近。北對清泗。則轉輸易通。南出江津。則風帆易達。繇淮入江。此其必爭之道矣。梁沈約曰。山陽北接清泗。臨淮守險。有平陽石鼈。田稻豐饒。北魏高閭謂壽陽。盱眙。淮陰。爲淮南之本原。豈不信哉。唐李邕曰。淮陰者。江海通津。淮楚之巨防也。其後楊吳據有淮南。以山陽。清口。爲門戶。遂能挫朱溫之鋒。及山陽入於後周。而南唐之烽火。近在江濱矣。宋人南遷。以江淮立國。於是山陽之勢益重。吳表臣曰。山陽控扼之地。失之則無以屏蔽淮東。徐宗偃曰。山陽南北必爭之地也。我得之。可以進取山東。敵若得之。淮南不能以朝夕固矣。陳敏曰。楚州南北噤喉也。長淮二千餘里。河道通北方。

者凡五。曰潁。曰蔡。曰渦。曰汴。曰泗。而通南方以入江者。惟楚州運河一處。周世宗自北神堰鑿老鶴河。通戰艦入大江。唐之淮南。不可復保。此前車也。是故韓世忠嘗保山陽。以拒方張之寇。

陳亮曰。韓世忠頓兵八萬於山陽。如

老熊之當道。而淮東得以安。此守淮之要法也。

劉錡議塞清口。以阻逆亮之師。

紹興三十一年。金亮南侵。劉錡鎮楚州。鑿敵舟沉清口。敵之舟師不能越也。會淮西喪敗。錡孤軍不能獨立。又病甚。不能治軍。乃引

而南。敵勢遂益張。

及蒙古侵陵。叛臣劉整亦勸其從事於清口。桃源爲進取之計。豈非地利不可或忽乎。元董搏

霄曰。淮安南北噤喉。江浙衝要。其地一失。兩淮皆未易保。今歲漕數百萬。咸取道於淮安。哽咽或生。則京師有立槁之慮。故特設重臣。置屯軍。以經略之。然則南北安危所係。豈不以淮安哉。

山陽縣

附郭。漢臨淮郡射陽縣地。後漢屬廣陵郡。晉因之。義熙中置縣。爲山陽郡治。以境內有山陽道而名。宋齊及梁因之。後魏亦爲山陽郡治。隋廢郡。尋爲楚州治。大業初。屬江都郡。唐亦爲楚州治。宋因之。紹定初。升山陽縣爲淮安軍。端平初。又改爲淮安州。

尋曰。淮安縣。德祐元年。元人於馬羅寨立山陽新城。以逼淮安。明年。淮

安陷。仍曰淮安縣。二年。以淮安并入山陽。明因之。編戶一百有二里。

淮安城

卽山陽舊城也。沈約云。義熙中始立山陽縣。或曰。城本東晉初所置。太和四年。桓溫伐燕。敗還。收散卒。屯於山陽。卽此城矣。自義熙以後。皆爲山陽郡治。宋元嘉二十八年。魏主禱南寇。至瓜步。山陽太守蕭僧珍悉歛其民入城。蓋陂水令滿。須魏人

至。決以灌之。魏人還至山陽。不敢留而去。梁太清中。沒於東魏。陳大建五年。吳明徹復取山陽。尋沒於後周。自隋以後。楚州皆治此。五代周顯德四年。周主攻楚州。克其月城。是也。宋末始改山陽曰淮安。元省。志云。今郡有三城。曰舊城。新城。聯城。舊城相傳卽

義熙故址。南宋初復修築之。北使過此。目爲銀鑄城是也。其北門曰閭門。南門樓曰宴花樓。西門曰望雲。城周十二里有奇。新城在舊城北一里。北辰鎮。元所置。山陽縣城也。張士誠改築。周七里。有奇。洪武二年。置大河衛於城內。舊城之北。新城之南。有隙地。嘉靖三十九年。築爲聯城。今亦謂之夾城。四門。十二樓。爲垣。凡七千丈有奇。

淮陰城

府西北四十里。秦縣。漢仍爲淮陰縣。韓信以楚王。改封淮陰侯。是也。尋屬臨淮郡。後漢屬下邳國。晉爲廣陵郡治。東晉時。建形都要。屯兵無地。乃營立城池。八年。以荀顗監青州軍事。鎮淮陰。太元三年。符秦將俱難等寇陷淮陰。既而謝元等進攻。帥舟師乘潮而上。夜焚淮橋。秦人敗遁。淮橋。秦人作於淮上。以渡兵者也。十年。謝元鎮淮陰。明年。以朱序代元。義熙五年。以南燕屢寇。淮北。詔并州刺史劉道憐鎮淮陰。宋泰始三年。使行徐州事。蕭道成鎮淮陰。五年。盡失淮北地。淮陰益爲重鎮。移兗州治焉。七年。謂之北兗州。齊建元初。魏人南侵。遣將拓跋嘉等分道出淮陰及廣陵。梁亦謂之北兗州。後又改置淮州及淮陰郡。太清三年。沒於東魏。亦曰淮州。及淮陰郡。而改淮陰縣曰淮恩。後齊因之。陳大建五年。伐齊。淮陰降。九年。沒於後周。又改縣曰壽張。僑置東平郡治焉。隋開皇初。復改郡曰淮陰。尋廢郡。以縣爲淮陰縣。屬楚州。大業初。州廢。又併縣入山陽。唐乾封二年。復析置淮陰縣。仍屬楚州。宋因之。紹興五年。廢爲鎮。明年復故。三十一年。金亮南侵。將自清口渡淮。劉錡次於淮陰。列兵運河岸以遏之。敵不敢進。嘉定七年。移縣於八里莊。尋復舊治。元至元二十年。并入山陽。

新城

在府西三十里。宋咸淳五年。置新城縣。爲控扼之處。屬楚州。元至元二十年。省入山陽。今城東北有仁義二壩。自城南引湖水。東北抵壩口。城西北有禮智信三壩。亦引湖水。西北抵壩口。每遇清江口淤塞。運船從東二壩入淮。官民商船。經西三壩入淮。

所謂淮安五壩也。永樂十三年。陳暄所置。

韓信城

府四十里。相傳韓信受封時所築。元至正十六年。張士誠遣兵攻淮安。褚不華與劉甲拒守。甲別將兵守韓信城。與淮安城相犄角。寇不能陷。會甲奉檄別往擊賊。淮南孤危。遂爲士誠所破。又有韓王莊。在淮陰故城西北。信冢宅皆在焉。○甘羅城。

在淮陰故城北一里。相傳甘羅所築。故淮陰亦兼甘羅之稱。運道攷。甘羅城東有天妃祠。祠東北爲天妃口。永樂初。陳瑄置新莊。闢於此。爲入淮之口。後移於三里溝。在甘羅城東南。謂之通濟閘。萬歷六年。又移闢於甘羅城南。西接淮口。卽今之運道。

倉城

在府城東南。寰宇記。山陽東南有故倉城。與郡城相接。隋文帝將伐陳。因舊城修築。儲積餘百萬石。大業末。恆有陳穀。亂後荒廢。志云。今府東南六十里有倉城。○拓塘城。在府西南四十里。有三城。約圍一里許。水經其西。相傳煬帝幸江都。聚糧處也。又有劉王城。在府東南十里。運河西岸。相傳吳王濞所築。又有西遼城。在府治東二里。相傳唐太宗征遼時。徵兵屯此。因名。

鉢池山

府西北四十里。以形似名。岡阜盤旋。凡三四里。今堤此以禦河患。又有金牛洞。在府西北十里。五代周世宗嘗宿兵於此。

淮水

在城北五里。自泗州龜山北麓東流。稍折而北。至清河縣南。黃河來會焉。又東北流。至城北。復東流九十里。經安東縣城南。又東北流入海。天下之大川。莫過於河。而淮又與之合。兩瀆同流。犇騰盤曲。郡適當其衝。故水患常多。而形勝亦萃焉。今詳見大

川河淮及

川瀆異同。

清江浦

在府城西。自城外達於淮。凡六十里。舊爲沙河。一名烏沙河。宋志。楚州北有山陽灣。淮流迅急。每致沉溺。雍熙中。漕臣劉蟠議開沙河。避淮水之險。喬維岳繼之。自楚州至淮陰。開導凡六十里。舟行便利。其後淤塞。明永樂中。平江伯陳瑄修治運河。

故老言。城西管家湖西北至鴨陳口。僅二十里。與清河口相值。宜鑿爲渠。引湖水入淮。以便漕運。瑄從之。乃鑿清江浦。引水經管家湖。入鴨陳口。達淮。繇管家湖築堤。亘十里。以便引舟。其入淮之處。設河口壩。新莊閘。以時啓閉。自新莊閘而東。因其高阜。遞爲

福興清江移風等閘。至府南淮陰驛。而合於瀆河。復慮北河漲溢。南侵漕河。於是隄北河南岸。長四十里以防之。又慮南河漲溢。北侵漕河。於是築漕河南高家堰一帶。長二十六里以防之。漕河只許糧船及進奉船入口。五口一放。旋過旋塞。設官監督。其大小官民船艦。悉繇五壩車盤。以達外河。無敢闌入者。於是運道通行無阻。後稍廢弛。至隆慶四年。淮決高家堰。清口淤塞。糧道艱阻。五年。漕臣王宗沐於府西南築高家堰隄。北自武家墩。經大小澗。至阜寧湖。計三十餘里。以捍淮之東侵。又於府之北境堤新城。起清江浦。經鉢池山。至柳浦灣。凡六十餘里。以捍河之南溢。萬歷五年。漕臣吳桂芳等修新莊等閘。增築清江浦南堤。以禦湖水。加北岸以禦黃淮。又板閘漕堤。南連舊堤。北接新堤。六年。河臣潘季馴復經理之。而運河復爲安流。浦旁有倉。以備積儲。爲轉輸之利。卽今常盈倉也。

山陽瀆

在府城東。古邗溝也。其入淮處。謂之末口。春秋哀九年。吳城邗溝。通江淮。杜氏曰。於邗江築城穿溝。東北通射陽湖。西北至末口入淮。以通糧道。是也。國語。夫差使王孫苟告勞於周曰。余沿江泝淮。闕溝深水。出於商魯之間。吳越春秋。吳將伐齊。自廣陵闕江通淮。卽此瀆矣。歷秦漢至南北朝。道出江淮。必繇此瀆。隋開皇九年。將伐陳。於揚州開山陽瀆。以通漕。大業元年。以邗溝水道屈曲。發民濬治。自山陽至揚子入江。渠廣四十步。舊自府城東南郭。又西北流。至城北達於淮。唐宋以來。運道皆繇此。明永樂初。創開新河。繇郡西徑達於淮。自府南六十里。平河橋。南抵瓜儀。則瀆河舊道也。今皆隄湖鑿渠。置閘設洞。以時啓閉。使旱潦相準。爲轉輸之利。亦謂之濁水。亦謂之內河。

老鸛河

在城西七十里。五代周顯德四年。略唐淮南。欲引戰艦自淮入江。阻北神堰。不得度。因鑿楚州西北鸛水。以通其道。旬日而成。巨艦數百艘。皆達於大江。蓋繇鸛河出山陽瀆。以入江也。或謂之灌口。隋大業中。築汴堤。自大梁至灌口。卽此。

故城河

在府東南五十里。本名壽河。唐景福初。朱全忠將劉瓚據楚州。感化節度使時溥自楚州而南。楊行密將張訓敗之。壽河遂取楚州。是也。河東入射陽湖。西南連黃浦。明宏治間。嘗濬之。以達鹽城。高郵寶應。興化諸處。

永濟河。在府南十里。一名新河。萬歷六年。以清江浦淺阻。開此濟運。長六十五里。設三閘。東接運瀆口。亦曰審灣閘。又西曰永清閘。又西曰龍江閘。以接於淮。行運一年。議者以妨於部稅。旋閉。二十四年。河臣楊一魁。以淮水泛溢。乃分引淮流。繇永濟河達

涇河。下射陽湖入海。既而復塞。天啓三年。以淮河正流淤淺。乃濬新河。以通回空等船。而大挑正河。明年。工畢。運船仍繇正河。新河復壩塞之。今涸。常居敬云。新河北去清江浦十里。內有管家湖。徐家湖。二澤。瀦水。宜時濬之。以防正河之匱乏。

涇河。府南五十里。亦入寶應縣界。分引漕河。漲溢。東流注於射陽湖。又澗河在府東南五十里。舊爲鹽城運道。府東境小水。多會於此。下流入射陽湖。○范家河在府城東。萬歷十四年。河決范家口。今有石堤防衛。又草灣河在府西二十里。淮河北岸。南對清

江浦。嘉靖三十二年。淮河旁決於此。分流成河。萬歷四年。河臣吳桂芳復開濬。之後通塞不時。十七年。河復繇此分流。凡六十里。至安東赤宴廟。仍歸正河。

射陽湖。府東南七十里。亦曰射陂。一名博支河。闊三十丈。長三百里。與鹽城。寶應縣分界。漢武帝予廣陵王胥有罪。其相勝之奏奪王射陂。是也。唐大歷三年。嘗置官屯於此。尋廢。今府境東南諸水。皆匯於湖中。復灌輸於淮以入海。而潮沙溢入。淺淤且過

矣。半

管家湖。在府城西望雲門外。宋嘉定閒。郡守應純之言。本州向西一帶。湖蕩相連。可以設險。合別開新河一道。與運河接。取土填壘。捍岸。則舊運河與湖通連。水面深闊。形勢益便。遂開河於湖北。築壘湖岸。以限湖水。自馬家灣西至陳文莊。於是管家湖與

老鶴河相接。楚州西北。宛然巨浸。且練習舟師。爲戰守計。敵不敢犯。一名西湖。其接老鶴河處。亦謂之新路。○阜甯湖在府西南五十里。通高家堰之南。又西接洪澤湖。淮水盛漲。往往挾湖水爲患。堤防常切焉。

洪澤屯。在府東。唐志。上元中。於射陽湖置洪澤屯。厥田沃壤。大獲其利。又有洪澤閘。宋隆興中。魏勝守海州。調發兵糧。繇運河至洪澤。出閘入淮。是也。○白水塘在府西南九十里。魏鄧艾修此灌田。置屯四十九處。與盱眙破釜塘相連。今詳揚州府寶應縣。

柳浦灣

府東北四十里。萬歷初，河臣潘季馴築堤防河處也。河防攷，柳浦東有高嶺巡司，亦河濱要口。季馴自柳浦接築長堤至此，凡四十里。

馬邏港

在府東北九十里。繇此陸路走廟灣。明初，徐達攻淮安，敗張士誠，援兵於此。遂拔淮安城。今有巡司戍此。唐順之曰：自馬邏陸路至廟灣，兵勢迂而饋餉亦艱，是也。又蘆浦港在府東北百十里，東南入射陽湖。○建義港在府東北八十里，東南流合

通濟溝，入射陽湖，又北注於淮。志云：通濟溝在府東北六十里，東經馬邏港而入射陽湖，西自橫溝入於淮。○高良澗在府西南九十里。志云：繇清河澗沙埠橋西入淮。萬歷二十一年，淮水決入此。

海

府東二百里有大海口，爲淮河入海處。其南爲廟灣，廟灣之西爲劉莊，又西南爲鹽城縣之姚家場，皆沿海大鎮也。大海口東南有蛤蜊麻線二港，爲窺伺之徑道。宋末，李全作亂，據楚州，遣海舟出海口，繇蘇州洋入平江，嘉興以習海道。明嘉靖中，倭亂廟灣，

劉莊受害尤劇云。

北神堰

在府城北五里，古未口也。吳王夫差溝通江淮之處，後人於此立堰，以淮水低溝水高，防其洩也。舟行度堰，始入淮，亦號爲平水堰。五代周顯德五年，自將兵攻楚州，欲引戰艦自淮入江，盡略淮南地，而齊雲艦大阻北神堰，不得度。謀鑿鶴水，以通

其道，遣使行視，還言地形不便，周主自往規畫，發民夫濬之，旬日而成。巨艦數百艘，皆達於江。唐人大驚，以爲神。宋天聖四年，易爲水堰，今新河導而北神堰遂廢。

高家堰

府西南四十里。漢陳登築堰防淮，此其故址也。明永樂初，陳瑄始爲築治。隆慶四年，淮水決於此，王宗沐復修葺之。萬歷三年，又爲淮水決壞。六年，潘季馴更爲修築，堤長六十里。河防攷：高家堰西有阜陵，洪澤諸湖。隆慶中，淮水挾湖水決於此，合

揚州寶應縣之白馬，汜光諸湖，又決黃浦入淺山，陽高寶興鹽諸境，悉爲巨浸。淮既東，黃河亦躡其後，西灌鳳泗，而清口壅塞，淮黃交病矣。萬歷中，更爲修築，堰南有越城周家橋，地勢稍亢，因築減水壩，淮水漲則溢入白馬湖，消則仍爲陸地，而後運道無阻。

蓋高堰者黃淮
兩河之關鍵也。

常豐堰。在府東南。唐大歷中。黜陟使李承置。以禦海潮。溉屯田瘠鹵。收常十倍他稅。又棠梨涇。志云。在淮陰西九十里。唐長慶初所開。

通濟閘

在淮陰故城南。卽濁水入淮處。永樂中。陳瑄於天妃寺東北通河之口。置新莊閘。爲運道咽喉之地。自新莊以至板閘。或爲四閘。或爲五閘。以時增減。達於城南。安治七年。河灌新莊閘口。至清江浦三十餘里。淤淺不通。詔有司修濬。嘉靖末。廢新莊閘。改置通濟閘於三里溝。隆慶中。河臣萬恭復開天妃口閘。以濟運。旣而復閉。天妃口。繇通濟閘。六年。河臣潘季馴奏。遷通濟閘於甘羅城南。今因之。

廟灣鎮

府東北百八十里。爲濱海衝要處。亦曰廟灣場。嘉靖中。倭寇往往闖入於此。志云。府東北九十里。爲馬邏鎮。有馬邏巡司。戍守百六十里。爲北沙鎮。又三十里。卽廟灣。有廟灣巡司。○劉莊在府東南百五十里。嘉靖二十八年。倭據廟灣。東侵淮安。官兵敗之於姚家蕩。又敗之於劉莊。賊復遁入廟灣。尋敗走。官軍追至蝦子港。賊乘舟開洋遁去。

南昌亭

在府西三十里。秦置亭於此。韓信寄食南昌亭長。是也。又歐陽戍亦在淮陰舊縣界。南北朝時。戍守於此。宋泰始中。吳喜使蕭道成屯軍歐陽。卽此。○羊砦在府東北二百二十里。有巡司戍守。其西爲戴百戶營。亦海口列戍處也。

周家橋

府西南九十餘里。北去高堰五十里。又南爲翟家壩。淮水東溢。往往從此奔衝。爲高寶一帶之患。隄防至切。又平河橋在府西南四十里。南至寶應縣六十里。爲往來通衢。○西義橋在新城西門外。舊名西鐵橋。爲行旅輳集之所。又東義橋在新城東門外。河防攷。清河而下。黃淮交流注海。越二十里。一大折於淮郡之西橋。又五十里。一大折於徐家壩。湍激之勢。不可無備。○志云。府城望雲門外有淮陰驛。又崇河。滿浦。二驛。今革。

清河縣

府西五十里。西南至泗州百五十里。南至泗州天長縣二百十里。漢淮陰縣地。唐爲臨淮縣地。乾符中。高駢置淮寧軍於淮口。卽此。宋爲泗川清河口地。紹興初。屯重兵於此。咸淳末。始置清河軍及縣。元至元十五年。廢軍。以縣屬淮安路。縣無城。今編戶

三十
六里

吳城

縣西二十里。大清河之涯。有東西三城。宋南渡後。嘗置縣於此。會要云。紹興五年。罷楚州吳城縣爲吳城鎮。是也。又有清河舊城。志云。縣初治大清口。元泰定中。黃河決溢。遷於甘羅城。大歷初。以地僻水災。民居稀少。遷於小清河口之西北。卽今治也。東

去淮陰

城十里

黃河

在縣西。自桃源縣流入境。至縣治西南清河口而入淮。自是河淮合一。沂泗諸流。盡失其舊。○淮河在縣治南。自泗州流入境。至小清河口。黃河流合焉。自此以東。淮皆變爲河。而客大主小。決溢不能免矣。

清河

在縣治西。卽泗水下流也。自山東泗水縣。流經徐邳之境。過桃源縣北。又東至縣西北三十里之三汊口。分爲大小二清河。大河繇縣治東北入淮。小河繇縣治西南入淮。卽古清口也。今爲河淮交會之口。詳見大川。

洪澤湖

在縣南六十里。湖長八十里。與泗州盱眙縣相接。又北萍湖在縣南九十里。與淮水通流。○三角湖在縣西北八里。四圍高阜。水瀦其中。雨潦漲溢。則注於大清河。志云。縣境湖澤相連。大小以數十計。其下流皆達於河淮。縣蓋鍾水之區矣。又雙溝

在縣西南三十里。出泗

州達家灣。通流入淮。

魚溝鎮

縣北四十里。又北二十里。舊爲金城驛。亦曰金城鄉。往來孔道也。又有浪石鎮。在縣東北二十里。萬歷十四年。議者欲自桃源縣界三汊鎮濬老黃河。經魚溝。浪石。又東至瓦子灘。顏家河。仍合安東縣赤宴廟之正河。是也。

洪澤鎮。亦曰洪澤驛。在河北岸。唐咸通九年。龐勛據彭城。其黨吳迥攻泗州甚急。勅使郭厚本將淮南兵救之。至洪澤。不敢進。辛諱從泗州出求救。因邀五百人至淮南岸。度淮擊賊。走之。明設洪澤巡司於此。○馬頭鎮在縣東七里。其下爲馬頭渡。有巡司。

戍守亦淮

濱要地

鹽城縣

府東南二百三十里。西南至高郵州二百四十里。北至安東縣二百里。漢鹽漬縣。屬臨淮郡。後漢屬廣陵郡。三國時廢。晉復置。仍屬廣陵郡。義熙中。改曰鹽城縣。劉宋屬山陽郡。齊梁因之。高齊置射陽郡。陳改曰鹽城郡。後周因之。隋初郡廢。仍曰鹽城縣。屬楚州。大業初。改屬江都郡。唐仍屬楚州。南唐屬泰州。宋復屬楚州。紹興初。屬漣水軍。尋復舊。元屬淮安路。今城周七里。編戶八十三里。

射陽城

縣西九十里。漢縣。屬臨淮郡。高祖封項伯爲侯邑。功臣表。漢六年。封劉繆爲射陽侯。卽項伯也。後漢屬廣陵郡。陳登爲廣陵太守。治射陽。三國時廢。晉復置。仍屬廣陵郡。劉宋僑置於江南。屬臨淮郡。而故射陽縣遂廢。齊梁因之。隋末。章徹據鹽城。置射州於故射陽縣。又分置新安。安樂縣。唐廢射州。省三縣俱入鹽城。戴延之西征記曰。吳王濞反於廣陵。射陽侯率衆至山陽。拒之。縣有山陽津。晉因以名郡。○巢城在縣北百二十里。相傳黃巢將寇廣陵。屯兵於此。因築是城。

沙岡

在縣西北。南抵縣西十八里之岡。門鎮東北距海。延袤五六十里。

海

在縣東。自海浦東北出洋。凡五十里。相傳元時漕運繇此港出海。以遠直沽。有隄在東門外二里。謂之捍海堰。唐大歷中。李承爲淮南節度判官。謂海潮漫爲鹽鹵。良田必廢。因自縣東北接山陽縣。南抵通泰海門。築堤障岸。綿亘數百里。宋天聖初。張綸刺泰州。留意修復。時范仲淹監西溪鹽倉。力贊之。議移堤勢稍西。壘石以固其外。迤邐如坡。不與水爭。雖洪濤不能衝擊。五年。堤成長一百四十三里。有奇。俗謂之塘潮岸。淳熙八年。淮東提舉趙伯昌言。捍海堰遮護民田。屏蔽鹽竈。其功甚大。今日就頽圯。每風潮

泛溢輒淹沒田廬。毀壞亭竈。自宣和紹興以來。屢被其害。望勅有司隨時修葺。務令堅久。從之。亦謂之范公堤。於是濱海沮洳瀉鹵之地。復爲良田。民得奠居。元詹士龍爲興化宰。復加修葺。民被其利。明景泰三年重修。嘉靖中。倭賊從山陽大海口闖入縣境。官軍據岸遏之。賊不能前。蓋不特田疇攸賴。而亦守禦所資也。

射陽湖

縣西北百四十里。明萬歷中。興化令歐陽東鳳議。以射陽淤塞。欲於湖旁二十餘里開神臺河。迤北繇葫蘆港。迤西出滕隴。喻口直走廟灣入海。不果。今與山陽寶應縣接界。○大蹤湖在縣西南百里。南北徑三十里。東西廣十五里。與興化分湖爲界。南接魚鯨湖。北達射陽湖。又馬鞍湖在縣西三十里。環三十里。下流亦北入於射陽湖。

蘆溝河

在縣西北六十里。志云。縣西五十里有東塘河。又西曰西塘河。俱自大蹤湖分流至此。合爲蘆溝河。又西北三十里。合於張岐塘。塘袤三十里。又北經縣西北百里之侍其汶。而合馬鞍湖之水。又西北達於射陽湖。

運河

在縣西南七十里。志云。通泰以北諸水。經縣西南八十里。爲東西界河。與興化縣中流分界。西入大蹤湖。自界河分流北出。爲舊運河。又有新運河。在縣東南五十里。流經縣東南三十里。伍祐鹽場。西北合於舊運河。又西北注於東塘河。又有官河。亦自大蹤湖引流而北。至縣西五十里。注東塘河。謂之鹽河。

廣惠礎

縣東三里。舊名白波湫。運河水漲則自此決泄入海。以殺水勢。夏秋海潮浩大。亦繇此衝入侵田。宋淳熙六年。攝縣事教授劉煒始用磚石鑿砌。名曰廣惠。明萬歷四年。河臣王宗沐修鹽城石礎海口。以疏運河漲水入海之路。卽此。邑志。廣惠礎。宋

紹興五年重修。洪

武二十九年復建。

鹽城監

在縣南古鹽亭也。歷代海岸煎鹽之所。南唐置監管鹽亭百二十三。寰宇記。南唐立鹽城鎮。周平江淮。因之不改。管鹽場九所。曰伍祐。曰柴莊。曰南八遊。曰北八遊。曰丁溪。曰竹子。曰新興。曰七惠。曰四安。俱在縣南北三五十里之間。邑志。縣民以煎

鹽為業。不耕種而富饒。公私商運。軸輻千計。此吳淠所以富國強兵。而抗衡漢室也。今府境之鹽場凡十。而在鹽城者四。曰白駒。曰劉莊。曰伍祐。曰新興。在山陽者一。曰廟灣。在海州者三。曰板浦。曰莞瀆。曰臨洪。在安東者凡二。曰興莊。團曰徐浦瀆。皆民生所

賴。而國用所資也。

所資也。

喻口鎮

縣西北百二十里有喻口渡。淮河津要也。宋紹定三年。叛賊李全據楚州。襲陷鹽城。誘射陽湖人造浮橋於喻口。以便鹽城往來。明設喻口鎮巡司。嘉靖中倭屯廟灣。唐順之謂若從寶應拖船過壩。自清溝喻口水路進攻。路徑而餉易。是也。清溝鎮

今在縣西百四十里。有清溝渡。縣西北四十里。又有清溝巡司。舊名崖溝。

朦朧鎮

縣北百八十里。志云。廣洋射陽諸湖下流。昔時俱經朦朧。喻口出廟灣入海。又有祚鎮。在縣東南三十里。新興鎮在縣北十八里。即伍祐。新興二鹽場也。又沙溝鎮在縣西百四十里。又縣西七十里有大岡鎮。又四十里為唐橋鎮。皆商民輳集之所。

○姚家蕩在縣西北商賈輳集為濱海大鎮。

安東縣

府東北九十里。北至海州二百八十里。西至桃源縣百六十里。漢淮浦縣地。屬臨淮郡。後漢屬下邳郡。晉屬廣陵郡。後省。齊建元年。始移東海郡治漣口縣。仍僑置襄贛縣於此。東魏曰海安郡。隋初廢郡。改縣曰漣水。屬海州。唐武德四年。置漣州。貞觀初

州廢。縣屬泗州。總章初。改屬楚州。咸亨五年。仍屬泗州。宋太平興國五年。置漣水軍。熙寧五年。改為縣。隸楚州。元祐初。復為軍。紹興五年。廢為縣。三十二年。復為軍。旋沒於金。紹定初。歸宋。改為縣。屬寶應州。端平初。又為漣水軍。景定初。改安東州。治漣水縣。元省縣。以州

屬淮安路。明初改州爲縣。縣無城。編戶四里。

金城。縣東北三十里。唐武德四年。分漣水縣置金城縣。貞觀初省。今爲金城鎮。志云。縣治東有三城。曰大城。曰東城。二城相連。夾城有濠。謂之市河。又有西城。與大城稍遠。百餘步。亦有濠。俱宋嘉熙中知州蕭均所築。今廢。城邑攷。縣北十五里有營城。元末董

搏霄駐兵於此。

淮水。在縣治南。白山陽縣流入境。縣西南三里有金剛嘴。突出淮岸。當波流衝激處。因砌築之。以殺水勢。遂爲西城。捍蔽。過縣南。東流五十里。折旋入海。海北有雲梯關。亦曰雲梯海口。志云。縣東十五里有淮堤。即范公堤也。

漣水。縣西北三里。即沭陽縣之沭水分流也。在沭陽者曰南漣。在縣境者曰北漣。又有西漣。中漣。東漣之名。中漣闊八十丈。北通官河。南通市河。其上流曰西漣。下流曰東漣。皆闊三十餘丈。自城東入淮。謂之漣口。漢志。淮浦縣有游水。北入海。水經注。淮水自

淮陰又東至淮浦縣。枝分爲游水。北至胸縣。與沭水合。蓋即漣水矣。蕭齊建元四年。魏人南侵。分遣元泰等一軍出漣口。杜佑曰。漣水縣有漣口渡。今黃河南注漣水。入於黃河。萬歷三十六年水漲。徙去民居。作壩相隔。漣水雖仍入河。離縣東漣口已十五里。

謂之塹上。

官河。縣北三十里。一名漕河。唐會要。垂拱四年。開泗州漣水縣新漕渠。以通海。沂密等州。南入於淮。宋元符初。工部言淮南開修楚州支家河。導漣水與淮通。賜名通漣河。即此河也。今自西漣南通中漣。至縣東北百里。接過蠻等河。南入淮。北通海州諸鹽場。

爲商旅輳集之道。○一帆河在縣東北五十里。南接東漣。北通海縣。東北過蠻。白陽等河。凡十餘道。皆西接官河。東入一帆河。以達於海。